

樂陵縣鄉土志卷之三

耆舊錄

樂邑古為千童縣而邊鎮舊縣為古饒安舊址考古者謂徐福入海所駐則樂邑實東瀛三島之祖國也今東瀛人文蔚起而樂邑無聞然先哲遺賢表著於前者猶不乏人也因採錄舊志以及近今百餘年來人所嘖嘖稱誦者編次於左志耆舊

漢

東方朔字曼倩厭次人武帝時舉賢良拜大中大夫夏侯湛贊曰正諫以明節詎諧以取容雄節邁倫高氣蓋世事詳漢書

成翊世字季明平原樂陵人嘗諫鄧太后歸政上書訟樊豐等誣罔

太子保

事詳漢書

苑

一作范

康字仲具重合人

後漢書註重合故城在滄州樂陵縣東

少與郭林宗親善舉

孝廉遷泰山太守郡內豪姓莫敢犯窮治中常侍侯覽族黨賓客在境內者以此得罪後得原還本郡事詳漢書

晉

石鑿字林伯樂陵厭次人仕魏累遷御史大夫多所糾正朝廷憚之晉受禪轉尚書後為太尉歲八十餘慷慨若少年事詳晉書本傳

北魏

朱元旭字君昇本樂陵人祖霸投劉義隆遂居青州之樂陵除尚書度支郎中時因郎選不精大加沙汰元旭獨以才用見留累遷至

尚書右丞除驃騎將軍

唐

高適字達夫渤海人

康熙間奉文祀樂陵鄉賢祠

生平高節義以功名自許史稱

其義而知變事詳唐書本傳

宋

趙鎔字化鈞樂陵人少涉獵文史美書翰以刀筆事太宗於蕃邸後

累擢東上閣門使知滄州兼兵馬部署完城塹嚴戰具賊嘗數百

騎至境聞有備引去後仕至知樞密院事檢校太傅事詳宋史

呂頤浩字元直樂陵人苗劉之變與張浚討之慷慨曰曩諫開邊幾

死宦官之手承乏漕輓幾陷腥羶之域今事不諧不過赤族為社

稷死豈不快乎浚壯之卒封秦國公謚忠穆事詳宋史本傳

呂抗頤浩子苗劉逼高宗避位頤浩會監司議皆莫敢對抗曰主上

春秋鼎盛二帝蒙塵日望拯救豈肯遽遜位於幼冲乎灼知兵變

無疑也頤浩即寓書張浚會兵討賊

元

張蘆字公文之賢子由國子伴讀仕至嘉議大夫同僉太常禮儀院

事謚孝穆才猷政績稱一時名臣孫飛卿累官至左丞護軍秉身

剛正不畏強禦飛卿嗣子志學由歲貢官刑部主事性嚴明能決

大疑獄

明

石友賢洪武間歲貢舉賢良方正任山西道監察御史鯁直激揚不避權要小事則舉正大事則糾劾一時權貴斂手

張燦由歲貢擢禮科給事中剛正敢言一時疏章多所建白忠烈矯矯權貴屏迹陞本科都給事中

王世福少負大志秉性剛直由歲貢任金壇訓導課士精勤解組歸耿介自持人不敢干以私子命選由歲貢任博士居家行政略仿其父

史邦直字忠厚隆慶戊辰進士為臨晉令治行稱最超擢河南僉事督淮徐營田辟田數百萬畝流亡來歸者百萬戶晉副使以不附張居正歸二子相繼成進士並官副使

宋槃字念義萬曆辛丑進士授山西長子令後轉大名縣申除縣稅三百餘條擢南京陝西道御史奏儲講久虛故老遠擯揆地單弱權使殃民封藩非法等十條以抗直外轉隴右僉事值歲祲擇饑民之壯者給糧修陴濬濠設粥廠以濟老幼晉榆林副使響水奏捷超擢右僉都御史巡撫陝西時逆閹攻擊東林槃亦東林也請告歸崇禎改元晉兵部侍郎轉署尚書事

見明史孫居相傳

張潑號念山萬曆丁未進士授曲周令擢浙江道御史首抗疏章奏留中之弊光宗崩李選侍據乾清宮公與楊漣等力爭移宮劾閣臣方從哲持異議熹宗冲齡踐祚潑議禁獻女子巡山西鹽政豁免貧商五十餘家留罰鍰千八百餘兩糶穀賑饑逆閹竊政潑疏

有便言易入拔山維艱等語忠賢啣之矯旨削奪崇禎初以原官起用升右副都御史巡撫河南以病歸其閣臣內外兼用疏廷臣和衷疏泰昌改元揭皆切時政兄活字戴山仕至德州府右長史廉慎與潑同

國朝

潘體震字長元康熙癸未進士以翰林典貴州鄉試所得多知名士孫勳提學貴州所造士體震皆摸索得之纂修治河方略歲荒煮粥以濟貧民改戶部員外轉兵部郎中皆清勤稱職

右採錄舊志名賢門

明

張彥啟由洪武庚午舉人仕至甯波府知府明初法令嚴明最重吏治彥啟以循良超擢

史高印字象賢邦直長子祖父病疽籲天請代病尋愈嘗捐學田二百五十畝萬曆己未成進士官襄陵東明元城三縣令卓有循聲提學陝西拔真材絕請託人稱關中夫子

史高先字紹卿邦直次子萬曆庚戌進士官南京戶部主事分司浦口江北解米虧運高先盡釐耗蠹收輒足額歲大祲捐廉賑濟特簡貴州提學蒐輯王文成邢太僕文集王家植史會表章之

張鵬南字羽衆以貢生考授中書擢太僕寺少卿督餉西甯籌運有方軍士悅服順治初以原官告歸遇二次大饑於邑中設粥賑

濟全萬人

國朝

鄭四國字帥之順治乙酉舉人由會試副榜令榆社革羨金清隱弊製紡車汰長馬刑清政簡遷直隸永平府同知

潘沂字魯南順治甲申拔貢令澠池邑經流寇之亂民散地荒沂力清浮累有二驛舊苦差繁沂申請歸官升建甯知府會大兵南下糗芻器用立辦而民不擾以母老歸延師課族弟十八人皆成名張道南字孟鐸由貢生授山西遼州知州姜瓖之變遼不守脅之二十餘日不屈改易州有清聲

張楫字友舟順治戊子副榜任澄江通判時吳三桂有逆謀楫求進

樂陵縣鄉土志 卷三

二十

表入都遂免於難後補淮安郡

史長昆字子裕以康熙丙辰進士令贊皇安集流民鎮撫土寇興學校毀淫祀革陋規分校順天鄉試得士甚盛

蔡塤字和衷以康熙己酉舉人授靖安知縣邑多虎塤乘冬月草枯縱火燎山虎悉遁嚴溺女禁縣運米舟小捐俸置巨艦免覆舟賠糧患

史繼經字緒史性孝友母好禮佛跪香恆夜盡數炷繼經率妻子代跪雖酷暑嚴寒無惰容後以康熙戊子舉人為膠州學正有張姓兄弟訟產積三年郡守委儒學助理繼經諭以孝弟委曲開導皆感悟學宮樂器久廢捐俸修置之

潘鵬雲字健六以康熙壬戌進士為工部主事己卯典試福建所得
多知名士陞刑部郎中廉明守法有疑獄多委勘遷順德知府治
尚簡靜

右採錄舊志治行門

五代周

李重進其先滄州人

舊志樂陵

周太祖之甥顯德初領武信軍節度使太
祖疾召重進受顧命後從世宗征劉崇以功領忠武軍節度進討
太原師還加同中書門下平章事恭帝嗣位加檢校太尉出鎮淮
南聞陳橋變舉兵不克縱火自焚

明

張九重閩邦畿並有勇力善騎射嘉靖間應義勇戰死於邊山東巡
撫榜其門曰忠勇

辛民邑庠生性剛方讀史至文文山傳慨然慕其為人崇禎壬午之
變將以身殉其子鼎苦止之輒誦人生自古誰無死留取丹心照
汗青句守城陷死之

劉方政果毅有方略明末泰山黑驢賊作亂方政應募討平之擢為
將後戰死

右採錄舊志忠節門

唐

蘇伏念以孝弟名通於朝廷吳正表數世同居旌表門閭

元

張之賢字世英性至孝母病思鮮魚衝寒走二百里以供母葬父日暴雨之賢號慟雨止窀穸成雨乃大作兄卒無子族人惑葬師言請遠兆域拒曰生雁行而死背之忍乎嘗夜迷澤中呼援俄有應者導之出問之曰吾受誣賴君辨雪故相報耳終不告姓名子策官至廉訪司僉事孝感芝生詔旌宅里

明

王祉由歲貢任成安訓導性至孝母鄭氏歿廬墓三年有雉兔異草之祥

宋應麟歲貢生官訓導性孝友父歿廬墓井出甘泉歲歉盜相戒勿

犯其廬曰恐驚孝子

張鳳岐字至山恩貢生父歿葬師卜地曰蕃仲子若啟祖並攢則爾子昌焉鳳岐蹙然曰祖藏魄久而啟之於義不安且弟貴猶吾貴也弗從弟子即中丞潑

楊爾修邑庠生父疾日侍湯藥不離側及卒廬墓三年同邑羅綱事母孝母歿亦廬墓

孫應元早喪父母賴祖撫育成人祖歿負土築墳廬墓三年縣令旌其門曰孝思振世

王世祿年九十五歲五世同居給壽官舉鄉飲

陳瑾貢生弟理年十三經亂流於外瑾出訪求得之鬻產得五百金贖歸

宋興隆事父孝值雨雹父偶思肉冒雨亟市以供父晚年病泄隆親滌穢污無情容父後患手痺隆親哺三年縣令表其門曰孝德貽型

卞士醇性孝母歿廬墓三年

右採錄舊志孝友門

晉

王歡字君厚安貧樂道不營產業嘗乞食誦詩家無斗石怡如也其妻求去歡笑曰卿不聞朱買臣耶後為通儒慕容暉署國子博士

樂陵縣鄉土志卷三

二十三

親就授經遷祭酒及暉為苻堅所滅歡死長安

明

杜向字濟美庠生通易理集古今名儒易解苦思力索擇其簡要者訂為易經便閱解

國朝

董養性字邁公拔貢生生平潛心理學所著有四書訂疑二十二卷易經訂疑十五卷易學啟蒙訂疑四卷又春秋訂疑十四卷鐫板未竟書經詩經禮記訂疑數十卷稿藏於家考訂詳明或發先儒所未發性至孝母病衣不解帶居喪一準古禮除甯國府通判政尚寬簡署南陵太平兩邑篆以經術飾吏治士民譜其政績於詩歌

為董公治行法傳錄卒於官篋中僅書數千卷而已
房致中字位公康熙甲子舉於鄉父樟勉之曰吾願汝為功名中人
尤望汝為道德中人乃砥行立志研究周程張朱之書及王唐瞿
薛之文後主文壇士類咸服

張我弓字宣苗安貧食淡以廉節自勵嗜經學多心得後登鄉薦未
仕

右採錄舊志儒林門

明

徐大應舉人邑自成化乙酉後九十年之掇科者大應少有才名中
嘉靖乙卯鄉試文風始振

樂陵縣鄉土志卷三

二十四

潘可久字純菴萬曆乙酉舉人撰邑志八卷

國朝

史以明字子敏寓目成誦淹通二十一史詩文千言立就甲申變聞
以祖父世受國恩鬱鬱成癩終明經著述甚富

王承乾字元御歲貢生遊其門者多知名士工書法著有易經傳象
金剛經解義鹿洞山房詩集遊覽紀勝諸書終寧陽訓導

潘五雲字雨六有文名兼工書畫康熙癸丑以諸生應詩畫選

欽定第一恥以藝進引退不就膺丙子鄉薦

張士睿字思公潛心經史旁涉諸家工詩文及書食餼於庠志不屑
屑進取遊歷天下山川都會幾半鄉有不善畏為所知有郭林宗

王彥方之風

鄭銳字脫穎才識高卓年五十始登乙科任魚台教諭方嚴不苟歸林下手不釋卷淹貫羣書著讀古愚見

董恕字子行邑諸生好學工詩文諳著述體嘗云人宜耐飢寒而氣不餒忍煩惱而神不困當恐懼而心不懾受誑騙而志不回著四書勉強齋備忘錄

潘內召字羹臣康熙丁酉順天舉人事親曲盡色養侍父疾勞不知痺父愈人歎曰父不愈於醫之良而愈於子之孝也任遵化知州以廉惠稱

王元達號坦夫恩貢生候選訓導秉性方嚴早歲食餼文名著甚制

藝多傳誦晚年究心於宣和書譜草書為時所重

右採錄舊志文苑門

明

余思銘元江西平章余潛之子入富平籍歸明詔率所部赴汴進勦司空山程德權有功授指揮同知復征餘黨平之晉鎮撫司又克懷慶澤潞等州縣攻桃花蟻大小二寨隨徐達取魯台陝西鳳翔等處收王保保進征西番後卒勅葬龍門里

張守忠從明成祖北征陣亡廕其子百戶八世孫顯宗任武襄左衛正千戶

張達素有勇力正德辛未劉六劉七等攻樂陵許忠節公達命達領

兵禦之力戰項中矢拔擲之氣彌厲射賊渠楊內官斬之賊敗遁乘勝斬級無算壬申賊益兵再抵城下遠復破之自是不敢窺樂境

薛運字吉所崇禎時任直隸趙州吏目後署趙州知州有政聲以世亂守城殉節

石如琇崇禎時人以壯健稱有舊縣賊雙頭和尚者率眾劫掠琇與同儕掩捕射殺之賊遂潰

國朝

薛受益邑人徙居高密驍勇有智略康熙初耿藩叛受益起行間從李文襄討賊累戰多捷官至總兵

樂陵縣鄉土志卷三

二十六

右採錄舊志武功門

明

韓守余邑民縣西南有通濟大道頻年淖泥萬歷十九年守余捐金修築五里長堤遂為坦途

劉仲良捐百金修橋三座收養七旬寡婦李氏劉氏同邑王命寵事繼母孝亦捐銀修學宮歲飢出穀濟貧民全活甚眾

李宗孔字小菴萬歷間人念同里多貧不能耕者乃飼二牛日繫門外里人輒牽去耕還繫其處謂之義牛今以小菴名其村云

國朝

張建南字華北歲貢生好義樂施嘗捐金四百餘兩修葺學宮衍聖

公贈額曰吾道功臣

張大賢字倍英博學工文以易學名家崇禎末亂兵攻城有守禦功康熙丙辰貢成均先是蠹胥勒派兵餉民大困推產於紳士不取直亂平大賢悉還其業人皆德之

張騰南字仲駟邑諸生性孝友師鹽山宿儒趙景皋嘗有以古物售者與以重價屢索不吝其人悔曰是誠長者我不知止真碩夫也張業禮字敬公邑庠生性沈靜和易田宅讓美於兩兄交友誠懇與鹽山趙爾孫商河王价同邑張士睿等十二人圖千秋盟一軸約婚必協喪必賻慶弔必同道德相切勵人稱前輩古誼

王陞王家莊民歲大飢親友數家無以舉火陞悉贍恤無間明年復

助以牛力耕本里人趙文高老且貧陞以田五畝養之又置義牛助人耕種設錢肆二十餘年貸出錢幾千萬不償者悉焚其券人感其德

張己百字明矣邑庠生少孤事母至孝生平慷慨尚義延名師教族黨子弟里中凡吉凶事貧乏者周之糧賦積捕悉為完納挑河撲蝗親督鄉役備索糧以助康熙間邑令虛報開懇加增攤洒己百力陳其弊邀詳免

石佳秀性方正嘗有少女投宿拒不納有婦赴邑納糧遺金塗中秀拾而俟之有頃婦攜子號泣來詢實還之後歲飢逃亡者多借居其家秀悉給以粟而遣之

蘇開基少孤事母以孝聞伯兄早逝視姪猶子生平好施予戚子張士德幼失怙恃開基撫育至成家室又有李文才程印寬等開基並周濟之或分產或指囷無少吝借貸有貧困者皆焚其券
劉玉奇張家莊民性醇謹和鄉里數十年無間言乾隆八年歲歉賙恤凡五十餘家均免流離

楊連玉楊家倉民好施予凡鄉里中無籽種缺薪米以及長不能婚喪不能葬者咸周恤之素端品詣睦族鄰一莊化之弭訟者五十餘年

王元凱字虞臣太學生篤學而未嘗得志訓諸子甚嚴每遇讀書人雅愛敬之於邑城北演武廳西捐地五六畝為義塾其樂善好施

類如此

右採錄舊志義行門

按舊志分名賢治行忠節孝友儒林文苑武功義行八門今仍其式而採擇之其隱逸藝術寓賢者壽仙釋列女概從闕如不敢違原例也至乾隆二十七年後其諸遺老得之傳聞者則按事業學問而增編之

事業

潘體豐字亨元少時讀書有大志嘗言致君澤民吾性分內事豈徒為掇拾科第計耶以歲貢生任四川廣元縣令有能聲舉卓異擢福建漳州府知府署汀漳道洊陞按察使時案牘山積披閱嘗至夜分不少倦尋轉布政使剔奸釐弊一意振作如折大獄凡興學校講武衛諸要政罔不殫精竭慮遂因勞成疾卒於任年甫五十時人惜之

潘同善字師虞乾隆己卯舉順天鄉試丙戌大挑分發廣東以知縣用歷任靈山陽春等縣潔己愛民尤以振興文教為急月課獎拔士子咸敦品學士風丕變去思弗衰

史尚確字易齋穎悟夙成自詩文外如醫卜星象及堪輿算學鐵筆繪事無不通曉由舉人官江蘇常熟縣十年未結之案片言折服時有十年雲埋終見日之歌歷署新陽長洲凡屢決大獄以憂歸服闋署甘泉震澤補上海縣民性悍鷙以寬御之咸感服鄰境患蝗至邑界不入協修南匯城濬淤河皆有成及去民香燭送者數十里以積勞卒於海防同知任

史彬光字涑亭由己酉拔貢銓甘肅華亭令地僻鮮文學下車後極力整頓擇佳士入署給膏火親為教授後俱成名邑武試鮮掇科者首拔阿輔清因獲秋捷時有清官不受錢愛文兼愛武之頌署中陋規悉除為令俸滿調阜康值回疆滋事兵差絡繹皆預為籌

備不累民所至稱賢宰

張厚郇字翼叔號緘谷紫峯先生子也幼聰穎長承家學研究經史子集動循規矩中乾隆戊子鄉榜選寧海州學正與諸生講學論文剖釋經義終日不倦嘉慶乙丑截取選湖南新田縣知縣下車即修葺書院暇日親講綱目等書訟舊有過山禮陋規革除之有殺人者賄啞人抵案一鞠得寔徭民被匪擾者除其害民婦被訟累省府交提申雪之四上得免祁陽縣民蕭姓唐姓爭山數十年不決訊之即服桂陽州刁生誣邑人誘販其使女察實刁生逃歸訴諸州關傳邑人卒不與訟日益稀解組後行李蕭然同僚助之乃得歸卒年八十長子伯寅字孚若庠生能以厚德承其家長孫

毓岱字仁東恩貢生持躬接物動遵古法道貌德容望而生敬有祖父遺風

史譜字蔭堂生而穎異未弱冠中乾隆壬子舉人嘉慶乙丑成進士授翰林歷充廣東湖北試官所取多寒畯官諫垣凡六載章奏僅六七上如嚴懲越訴調劑五城貧民棉衣至今為法累陞雲南藩司滇中銅務自乾隆間例撥工本運脚銀百萬兩後核減二十餘萬兩積虧甚巨譜釐剔轆轤請復舊額貢院號舍湫隘倡捐拓充以憂歸服闋授秦藩值西寇起調轉兵差事集而民不擾旋擢巡撫漢江水溢被灾二十七州縣悉賑濟之全活無算延榆綏苦旱力請緩征後由黔撫入

覲授光祿卿歷升兵部左侍郎卒

史評字衡堂幼岐嶷嘉慶戊辰成進士入翰林官至禮部左侍郎庚午典試四川丙子分校順天門下皆知名士官祭酒時值大考因手疾請假疾愈補試於

南書房

上親覽稱善特

命附二等次年晉閣學先是從兄中丞譜入

覲留京補正詹公亦擢少詹友昆同居內省賦詩紀

恩都下傳為盛事後督學浙江任滿卒於使署遺疏入

上深惜之浙人公贈輓詞有八百單寒攀繡轂一輪明月照西湖之句

蓋紀實也

賈聲槐字閣聞號艮山年十四歲以縣試第一入庠旋食餼乾隆己酉中副車甲寅領北闈鄉薦嘉慶己未成進士主政農部補湖廣道監察御史轉掌江西道陞授刑科給事中轉禮科掌印給事中專章條奏十數上均奉

旨允行如清釐外省捐項嚴禁投効假冒一摺奉

硃批所奏甚是又如錢糧以解司為完整飭倉務畫一捐項省控案件禁批回寶缺州縣禁調署暨章邱收漕斃命案沂州匪劫七十二案山東通省未結八十九案均奏請核辦奉

命巡視淮安漕務適徒陽河淺阻公為文禱於神時嚴冬水一夜驟長

數尺糧艘飛渡人以為誠感

授河南南汝光道庚辰秋奉

命署理河南按察使審理平允招解案必搜覽慮府縣失實也辛巳充河南鄉試提調官時河南積案待理中丞擬專摺保奏以憂去不果道光丙戌服闋授浙江溫處兵備道督造哨船嚴緝洋面所管關稅及茶引局嚴密稽查郡城舊有水師兵民雜處公鎮以寬和無滋事者晚歲以秉性剛正不能阿附上官告歸日事著述著有四書思辨錄尚書說周易解偶錄艮山文集俱行世其學行宦蹟載本省通志並見河南浙江兩省通志

潘勤字逸亭練達有吏才初任直隸南宮縣丞興利除害每匡邑令

樂陵縣鄉志

卷三

三十二

所不逮大府知其能薦升平山知縣值教匪倡亂民心惶恐設計誘擒其魁解散餘黨亂平調大興知縣歲饑捐廉倡設粥廠全活無算升順天西路同知卒

鄭葵字耀堂生而朴誠甫十齡讀遍諸經弱冠潛心羣書尤服膺宋儒語錄嘉慶癸酉舉於鄉丙戌大挑以知縣分發河南初令柘城時有奉

旨大獄一鞠結焉紀大功二十遂總通省獄局歷任祥符淇縣舞陽偃師革胥吏供給與訟案各陋規盡覆盜賊巢窟潔己愛民偃人建生祠祀之陞鄭州時銀價漲徵錢不敷士民請加收不允州舊無包穀購種教藝至今呼為鄭公糧署彰德知府歲饑請撫交卸後

復捐廉二千金助春賑以卓異

授懷慶府王紳子以平反父獄奉三千金為壽力卻之建議渙河溉田
可得膏腴千餘頃以憂去不果行管祥符中牟河工兩料場力除
奸弊有

詔辦武定府團練事竣不復出有至性所得廉俸分與諸弟薛氏姑家
中落為置田百畝且迎養焉設義倉置義學以贍族人既歿入祀
豫省名宦張相國之洞銘其墓

張源長字秋圃父沒都中徒步扶柩歸里授徒讀書恆達旦不寐由
詞林充

國史館纂修再充嘉慶己巳辛未會試同考官所取多知名士升兵

科給事中遇事敢言前後條奏河工料垛及邳宿運河工段漕務
利弊五城粥廠額賞多奉

旨俞允稽本裕倉緞匹庫剔除積弊巡視南城審理積案遠近稱頌焉
張伯良字亞蕭廩貢生性至孝由議敘權湖南醴陵令有冤獄久不
結一鞠而釋者殆百人西月清積案千數適江西蛟起水大至懷
印棲樹上危急中惟以老母災黎為默祝恍如神助水遽退賑撫
瘡痍創有加戶無減丁之法全活無算因題授綏甯令以獎其勞
因母思家陳情歸

鄭輝堂字韞山豁達不羈聰穎異常十一齡應童子試邑侯即器重
之道光壬辰領解順天癸巳成進士由庶吉士授廣西永醇令政

尚寬和邊民難化以簡易治之邑俗男不操作分秧插田皆婦人
事乃肖像繪圖懸座右得知民間艱苦講學時以男女有別訓士
子久之咸知廉恥舊俗漸革調凌雲升西隆州所在有美政分校
鄉闈錄取皆知名士梁本檀唐咸仰俱出其門大計卓異候升以
父喪去官不復出

張汝瀛字仙洲性篤孝以道光辛巳舉人揀發廣西歷署平南桂平
荔浦甯明州象州貴縣時粵匪亂甫萌所至能以威克政聲卓然
在荔浦越境捕湖南亂民李沅發擢同知在貴縣值洪秀全各股
大起鋤治艇寇升知府

欽差宣封越南國副使楚督文章薦之咸豐三年以收復岳州功加道

銜由署漢陽守存擢漢黃德道未幾粵寇由九江回竄與督糧道
徐豐玉率舟師禦之於田家鎮寇大至據半壁山以巨礮俯擊我
軍衆潰力支五日無援正衣冠冒矢石手刃數賊力竭沒於陣賊
素畏其英勇憾尤甚截骨焚骸餘燼悉投江中事

聞奉

旨照二品從優議卹

予謚勇節

御製碑文

賜祭葬

賞騎都尉世職入祀

京師昭忠祠及殉難地方本籍建立專祠敘衣冠瘞馬
張汝沅字相帆由道光壬辰舉人檢安徽知縣奉皖撫江忠愍忠源
公檄辦廬州糧台兼巡街道賊以地雷轟城陷西北隅急率勇回
保糧台抵得勝門遇賊巷戰大呼殺賊身被數十創力竭遇害奉
旨予雲騎尉世職與從汝瀛陣亡相隔數月咸謂雙忠萃於一門矣
賈亨晉號煦階艮山先生仲子入太學應南北鄉試屢薦不售就職
通判分省湖南入讞局明敏有智略遇疑難獄輒推往治補衡州
府管鹽通判梟匪素獷悍悉擒治其尤者鹽務以肅再調岳州府
通判歷署益陽巴陵耒陽容華等縣知縣桂楊州道州知州實心
為民興除利弊所至皆有政績匪鍾杰滋事隨大軍進剿事定

擢古文坪同知再補永綏直隸廳同知咸豐初粵逆猖獗擾及湖南亨
晉奉檄帶苗兵助剿選九百餘人逐日訓練遂成勁旅二年賊陷
岳州進逼省垣時大軍出禦各隘城守甚單聞警急馳赴援賊退
解嚴陞湖北黃州府知府初賊撲長沙湖南屬郡土寇竄起岳州
有周齋公雷伯魁者受洪逆偽札遙相應和亨晉時留署岳州親
統弁兵遞擒周雷以下黨羽數百人正法地方漸次肅清事

聞實授岳州府知府郡經兩次失守城壞公捐廉倡修工未竟賊至遂
陷臨難前夕作書訣家人謂脩事之咎固有攸歸城亡與亡義無
可辭云云公剛正慷慨以賢豪自勉未嘗攀援上官終以直介齟
齟為時所忌才未大展而遇難事亦湮沒不彰時論惜之殉節事

載湖南通志並岳州府志于徵策增生以府經歷署直隸通化易州州同判皆有政績以海運勞績保知縣

禹建鈞字仲甫德傑仲子道光乙巳進士以知縣分發河南辦賑務禁吏侵漁貧民死溝壑者捐資葬之民號青天署永城興利剔弊盡釋冤獄三月而政通人和署安陽漳水為患教民築隄邑之寒士納署中親教之有巨奸犯案已賄吏而去其名到任後仍置之法其仁明類如此

王榮第號雲楣自幼讀書沈潛異於常人弱冠入庠食餼充道丁酉拔貢庚子順天舉人乙巳成進士改庶吉士授職編修充

國史館協修補河南道御史掌浙江道轉京畿道巡視北城稽查祿

未倉所在必舉其職上封事十餘皆焚其稿曰慎密不出臣道宜然非第不欲沽直名也咸豐甲寅出守歸德時宋邸淪陷之後又值捻逆披猖抵任後修城郭練鄉團儲米粟預為戒備適捻匪張落刑率眾西犯直撲城下槍礮晝夜不絕聲民大恐榮第集諸團諭之曰與城存亡守土者之責諸君室家所在舍効死無他策能從我固守乎皆踴躍以應乃選丁壯簡器械捕奸宄率眾登埤張幕住城上巡視不少息夜輒募勇士繼城所賊營凡旬餘賊不得逞始遁去叙守城功升道員戊午署開歸陳許道辛酉

簡河南彰衛懷道兩處轄境黃河堤工數百里值盛漲險工迭出日督修防雖大風雨晝夜駐工罔懈迄無失事以防河功

賞戴花翎積匪李占標以募勇為名潛謀蠢動公立捕治之散其黨羽
遐邇懾服旋

擢河南按察使署布政使護撫篆時豫省錢糧多闕緩而各路催餉軍
書紛投迭至榮第恐貽誤慨然將俸銀墊解三千兩度其緩急未
嘗匱乏而終亦不取償蓋經濟素具云

王榮琯字五文道光己酉優貢咸豐己未

恩科解元庚申

恩科進士入詞林供職史館充

國史館協修功臣館總纂同治丁卯充江南鄉試副考官得願副等
三百三十二人多知名士補山西道御史抽查通橋漕糧逐袋量

較不憚煩轉貴州道御史稽查祿米倉每開倉攜帶樣米逐款核
對書役不得售其奸巡視西城清查保甲嚴馭吏役比戶肅然督
理五城街道奸僧皆斂迹

恭邸嘗謂文鑑堂先生曰如王君之曉暢公事不憚勤勞使人皆如
此不患吏治無起色矣其見推如此光緒乙亥充雲南鄉試副考
官雲南當兵燹之餘文風頓替悉心校閱得王家弼等一百四十
人多老名宿兩次典試皆有星轅日記是年補工科給事中時各
州縣收漕米每量米一斗先用木盤驗看米色盤約七八斤名曰
樣盤民苦之遂上疏極言其弊得悉除去所除弊政甚多此其一
端也其奏稿率皆焚之任京秩十餘年凡

召見四次

垂詢料分及翰院諫院辦公諸事甚悉及

簡放河南彰衛懷兵溝道復蒙

兩宮垂詢周詳奏悉稱

旨

天顏溫霽勛以潔已率屬察吏安民之道人方以大用為公期乃未及

到任遽以病卒惜哉

王榮烈字炳文以諸生佐兄榮第守歸德城以功保教職豫撫英桂
奇其才擢帶親軍攻雒河集破白龍王廟轉戰皆捷保知縣出師
穎亳蒙宿間解確山城圍賊軍角于山帥師進勦所歷皆羊腸小

樂陵縣鄉土志卷三

三十八

徑至馬石坪馬隊先進失利衆欲退公挺身直出曰險隘在山口
若為賊據進為所逼退為所掩全軍殆矣欲生者從我先登躍馬
直前衆勇氣百倍遂占山口賊被逼上山乘勢下撲榮烈督軍三
撲三迎賊仍不退乃密遣炮隊從山後擊其背賊始敗走叙功以
知州留豫補用庚申勝保來豫督辦軍務以榮烈智勇兼優派隨
營督隊以破李河溜賊巢晉知府是年七月擒匪西寧鹿邑督隊
馳勦遇賊於古橋指揮馬步隊奮力攻擊賊敗走追殺無算豫境
幾肅清豫撫專疏奏

聞

以知府記名賞勇號八月追賊至汝陽縣之野竹岡時擒匪數萬官
軍不及三之一公慷慨陷陣督隊馳擊鏖戰逾時衆寡不敵全軍

失利公受傷落馬大呼曰男兒死沙場幸也裹創血戰賊衆蟻附
遂遇害年僅三十事

聞賜太僕寺卿銜雲騎尉世職謚忠毅

御製碑文汝寧汝陽建立專祠 事詳 國史忠義傳

王榮壽字鶴文五歲失怙從諸兄讀弱冠入庠食廩咸豐辛酉膺選
拔科例授中書舍人同治戊辰捻逆北犯逼縣境榮壽糾鄉團嚴
守以待賊膚至知有備始引去復糾鄉衆築圍寨倡捐鉅款衆佐
之不浹月而工竣嗣賊屢至終未得入鄉里獲安事定敘守城功
加侍讀銜藍翎性穎悟讀書稽古有所得輒手鈔之裒然成帙工
帖括試律尤好作古近體詩同治庚午舉於鄉兩上春官薦而不

售年四十而卒士林惜之

史魁英由行伍從軍江南剿洪逆屢立戰功授千總晉守備補武定
營守備未赴任後巡邏楊州城賊奄至我軍只數百人竭力奮擊
因衆寡不敵遇害

賜卹雲騎尉世職

李熙載字梅村太學生慷慨多大節倡修 聖廟議敘縣丞任良鄉
捐立書院士風以振以憂歸就知縣聽斷明決善治盜有疑獄多
委焉咸豐三年粵逆北竄土寇蠢動邑北滄鹽一帶回匪鹽島羣
起焚劫日謀脅衆南下熙載適奉委緝捕在籍會同鹽山縣令號
召鄉勇應者雲集圍匪老巢之小梁山獲匪首二十餘人散餘黨

數邑獲安時東撫崇駐節德州檄赴行轅慰之曰非君則河北七邑糜爛矣欲奏

聞熙載曰各為身家耳且藉衆人之力而受賞何顏對鄉里力辭而歸九年豫撫李鶴年檄襄河南軍務而熙載以奉團練杜大臣調辦樂陵團務值邑匪抗漕劫官攻城搶劫駸駸日盛時山東擒匪往來未遑北顧熙載會同縣令出資募勇勤撲羽黨旋散旋聚支撐幾二年家資盡耗卒獲逆首討平之是時也匪南連商惠土匪北結回烏謀大舉非公數邑將危殆始粵匪亂後熙載於所居高垣墉固守禦人或以為不急之務同治戊辰夏擒匪蹂躪河朔三四月滄鹽甯樂未避難者數萬戶皆獲生全始服其先見

火炳第字雲門由廩貢就教職歷署冠縣肥城旋以縣丞分直隸委署獨石口近古長城每與幕友輩登高眺遠見古豪傑立功絕域慨然有遺世獨立之思後補南和令下車整頓學校嚴禁盜賊邑有袁某聚衆數百人晝伏夜動大為邑患偵知其巢穴親捕之境賴以安南河與沙河接壤其間白溝河水患時興兩縣民訟歷年不決炳第熟察河形疏濬之定河界至今稱便家居卹孤寡賑貧窮建家祠修族譜稱盛德焉

張鴻字文卿庠生從毛帥祀熙辦理軍務歷保同知直隸州補羅山令政績卓著紳民為立去思碑

張桂芬字月村幼讀書家貧刻苦勵志光緒丁丑捷南宮筮仕直隸

性情風厲不事干謁熟河都統崇文山重之奏補灤平調建昌馬賊猖獗為商旅患梟百餘匪邑境遂安因獲巨匪楊步雲黨出力某大吏授意欲得三千金為保道府婉謝之抵任捐造書院助膏火紳民刊碑紀之任邢臺修衙署辦積穀保甲諸要政邢邑地當孔道甲午南省徵兵數百營皆由茲北上車行逃匿乃捐廉買車供役不累民聽訟不詞費而曲直立判歷任有青天之譽後護理順德府知府

李毓琳字子圭太學生性爽利同治戊辰擒匪犯樂陵以守圩功議敘從九捐通判分發直隸入獄局能斷大獄有疑獄輒委之署高陽知縣權貴懾服水災請賑親騎一騾查勘無漏者署新城同知

安輯農民惠愛商賈初擒匪犯樂土圩少一時避難來者數萬戶毓琳安插男女籌備守禦不遑寢食者四五夜全活數十萬人遠近賴之

文學

賈啟元字仁宇歲貢生講學力行親歿廬墓三年選陞野縣訓導陞江蘇海州學正教生徒以禮法得士心邑人為立去思碑著有忠恕堂會約錄

賈初元字春宇增廣生性超曠著有高津居士詩草二卷選入本郡詩鈔又有文集一卷待梓

史爾信字獻誠醅謹為謙喜怒不形於色雖卑幼亦加禮航於經史尤喜讀唐宋諸大家文由康熙庚子科舉人任平度州學正擢濟南教授非公事不出戶江左蔣大司馬服其文為山左學使時甚優禮焉後告歸年近八旬手不釋卷

宋著雍正壬子舉人才高識卓遇事明斷有氣節族里倚重之文名重一邑遠近多尊師焉會試屢薦弗售年六十不遇遂放情文酒賣志以歿

薛樞號尺庵本洛南人以雍正庚戌翰林改御史遷廣東參議謫居樂陵學問淵博造就後進邑科目多出其門著暉遠堂賸言六卷周易象意八卷

張鏐字紫峰號心陽子年十九入邑庠旋食餼中雍正丙午副榜不及充貢乾隆辛酉選拔貢成均甲子舉於鄉就教職任臨清州學正踰三歲告歸生平潛心理學遵程朱時習靜坐既而曰此未足恃也惟主一無適一語隨處皆可致力因別號一銘齋居士所輯

有朱子四書彙編二十五卷周易晚學編十六卷張子淵源錄十卷申送四庫書館又春秋大義十七卷一銘齋四書擇中錄十三卷申送史館又一銘齋寸心集二卷中庸九經衍義二卷又訂東山百士行二卷張氏前賢錄十四卷古訓集彙一卷皆存於家他如邑乘族譜碑銘記傳著述尚多居家操行謹密非禮弗履遇有意外之侮弗與校遠近莫不欽其德為廣文時以不肯舉某生優行忤當事者幾獲戾諸生服其公卒年七十有七縣令邵祠之於文昌閣西偏十一賢祠

賈三奇字東乾號蒼春歲貢生候選訓導學優品端睦宗收族讀書雖老不倦著有抱真山房文集一卷選入山左古文鈔又詩集二

卷

賈玉槐字幼培增廣生舉止方嚴學問博洽諸子百家之書無不讀著有古文集三經條解藏於家

宋芷乾隆己卯舉人幼歲舉止儼若成人十歲就傅通韻學及長經史子集寓目成誦少應試受知太守鄭方坤年未四十卒與胞兄士子舉人著同為一時名宿有詩餘一卷宋氏博徵錄一卷

房重耀字華亭乾隆甲寅舉人歷任即墨壽張壽光教諭以俸滿歸天性樸誠事親以孝聞兄弟四人不忍析居初教授滄津聞訓生徒重品行而次文藝及為學官肄業者恒百餘人類皆文學博雅品行端方居恒薄於自奉而捐貲建書院立義學解組後兩袖清

風而已

賈翰陞字默山歲貢生挑取騰錄任鹿鹿縣教諭學行俱優性高曠
有古風居家彈琴詠歌弗輟遠近生徒數十人出其門者多時譽
著有有一言齋行世

宋登甲乾隆庚寅舉人蓬萊縣教諭陞登州教授性元爽歷任二十
餘年與諸生款洽如塾師旋里時祖餞擁道闔學感其誼焉

張世純字穆堂歲貢生本邑名宿學問淵博士多敬重之所著有四
書典故前續兩編

薛醅字羲菴嘉慶甲子科舉人好學深思不求仕進惟杜門訓子長
子謙先八邑庠次子冲懷舉明經見讀書人輒獎勵之一時學者

多受其造就焉

王培號植園生而穎異未弱冠入庠食餼刻苦窮經嘉慶辛酉膺選
拔庚午魁順天鄉試辛未聯捷成進士入翰林改戶部主事分浙
江司戶部為錢糧總匯培悉心研核絲毫無舛書吏弗敢欺堂官
嘉其勤能欲保送軍機以在部未久弗得補遽以疾歿年甫四十
一文章經濟未竟所施士論惜之

蔡允修字公敏學問深粹由嘉慶戊辰副榜選授肥城縣教諭升登
州教授著有四書講義因肥城學署後有鸞台名為鸞台講義並
周易觀象補參文藝合編卒年八十四

潘錫榮字錦堂少力學誦讀早夜不輟嘉慶己卯成進士任河南孟

津縣令邑多訟每值聽訟不用笞杖多方勸導令其悔悟邑人感之訟日稀少雖仕猶足書生本色嘗語人曰吾一生無他長惟寬厚待人謹慎處事二語差堪自信耳

史彬固號班亭生平足跡不履塵市名課庠序鄉闈屢薦不售終於明經縣尹重其學延入署課子弟除談文藝外不涉公事主書院講席十餘年一時英俊俱出其門歿後會葬者百餘人傳為盛事史誨字迪堂幼失怙與兄中丞譜友愛臻至才敏好學小試輒冠軍而鄉闈屢躓以拔貢終至老手不釋卷戚族子弟多從學量才指授俱成就寡交遊喜施與非公不至縣署如建試院修文廟造橋梁諸義舉慨然捐貲為衆倡咸豐初邑舉孝廉大令及闔邑公保

力辭不受譜雖敷歷中外而誨清淡家居歸衣蔬食尤為人所難云

史炳鼎字鼎臣性嗜讀年二十九中道光甲午副榜遂無志進取惟涉獵書史工隸書法秦漢年逾八旬猶手不釋卷所錄先賢格言及古今忠孝篇並有益於人心者數千卷家徒四壁晏如也自書其室曰不懂人情世事却知往古來今其蘊蓄可知矣八十六歲卒

史炳符字雲台賦資明敏為文不假思索輒成數百言而秀韻天成尤為可愛少年授南宮官刑曹屢理大獄反覆推勘恒漏數下猶不寐曰人命至重恐有冤枉也堂官譚竹崖深器之

李彬字班堂以進士任山西靈川縣知縣多惠政解組後兩袖清風猶以教讀為業一時名宿多出其門

張紱植字羅若道光甲午科舉人任德平縣訓導居官清敏訓迪士子寒暑不怠遇孤貧者捐俸助之文風大振同治戊辰擒匪直撲德平城下守東門晝夜不少休城賴以完東撫丁保陞教授

張劍池字龍泉歲貢生品學兼優事母至孝所著有周易清簡錄尚書清簡錄歷代帝王記畧學者爭相傳錄

賈撰策字論庵資秉穎敏家學淵源未弱冠舉於鄉同治壬戌進士歷任貴州開泰普安縣知縣所在有惠政充甲子丁卯鄉試同考官所拔多積學之士晉獨山州知州性孝友在黔省十餘年恒以

家貧親老為憂兄仲雅從之官先卒撰策哀毀成疾年四十卒於官

黃之燮字綰卿以舉人任邱縣教諭門外問業者屢常滿教士以讀書明理為先以身體力行為本故游其門者皆重德行而後文藝解組後歸家無餘資近族有因產爭訟者推田宅予之

孫敏復字宗顏資稟純粹謹厚寡言弱冠遊邑庠及壯食餼累舉優行文名藉甚而秋闈困厄七薦不售力學自如貢成均就教職乙亥舉孝廉方正

王承益號菊丞性沈靜言笑不苟讀書迥異常人弱冠泮食餼每試各文宗無不擊節稱賞同治丁卯科優貢中光緒己卯科舉人

戊會試第九名貢士授職主事分兵部歷主陽信樂陵及京都願
學堂各講席臬比所至咸以敦品力學勗多士故及門諸子多騰
達在都供職日少未及銓補遽以病歿於京寓

鄭溥元字苓泉幼穎悟未冠應童子試郡侯深器之十七入邑庠旋
食餼同治甲子乙丑聯捷成進士入詞林升御史歷任江南京畿
監察道署四川山西道侃侃言事不避權貴盤查儲濟倉及內倉
皆力除漏規絲毫不苟丙子分校順天鄉圍所得皆知名士壬午
監試順天鄉圍仕至刑科掌印給事中以剛直言事忤上官歸里
圖書外無長物歷主甯津慶雲夏津樂陵講席恒自言曰吾優游
林下有三樂朝夕得侍老母一也終歲課子姪讀二也得此邦英

才而教育之三也性嗜書尤喜董華亭米襄陽帖有索書者立揮
就之生平著作甚富惟館課詩賦行世所居村地窪下雨水無所
洩倡議開水道入盤河鄉人賴之年六十丁母憂一慟幾絕越數
月亦卒

張積善字春圃家貧力學同治庚午舉人教授生徒以敦品立行為
先不計束修成就甚衆

篤行

張廷實字通安邑諸生父性嗜酒好結客文字之飲淋漓達旦人擬之陳孟公廷實先意承志具鮮腆以佐歡父歿家漸落母未習粗衣蔬食鬻田典宅以奉甘旨至寒無纊卧無衾晨夕供給猶極甘脆不使母知所出也妻潘氏尤篤孝每食必問所欲以進有不當意數作不煩以至潞厠扶掖數十年未嘗更二手外家近在數百步經年不暇歸寤母終逾四十八日妻勞瘁哀毀以卒廷實叩母棺呼曰婦得侍母甚慰終不如兒之安貼也越數月亦卒識與不識莫不臨弔太息曰孝子死矣

董之華字夏衡奮志寒窗二十餘年每類記節孝忠義事於冊箴銘

格言多書於壁日日與古人伍見其言如晤其人尤喜稱終身讓路不枉百步終身讓畔不枉一段等語故平生廉隅自飭未嘗輕入城市性嚴正處事詳慎嘗見戚黨中以貨自雄者恥與之見後其人家中落厚贈之遭時亂有杜宋二生避兵於其家日持漢書講解不輟其學守如此

鄭四知字畏之庠生幼以孝聞母歿誓不茹葷酒廬墓三年朝夕奠灌如事生焉見府志

張金詔字耐夫國學生尚義好施薄田數百畝賴以舉火者十餘家皆出其才與謀生計卒致小康少年遇外侮輒盛氣禦之事過復修舊好嘗曰人絀於理非絀於我也奚計焉

張裕中字左巖性孝友八歲時母一病三年侍湯藥勤按摩無少間母雖使人代之不肯也父患疽侍疾日夜不寐及父母相繼歿治殯自春迄冬屢絕食一病三月幾至不起服除後奮志讀書思顯揚乃兩中副車遂成進取

張燮字贊猷太學生父成龍為湖北漢陽府通判卒於官時方四歲拜跪如成童事母曲盡色笑母病朝夕侍左右凡用藥餌不假手他人夜常不寐數年如一日母卒哀毀逾節葬後於塋樹傍起小廬寢息其中晨夕拜跪日再進飲雨雪寒暑未嘗間終制親友固邀始歸

潘凌鶴字誨齋歲貢生堂邑縣訓導居心公正城西數十里推為眾

莊之首有爭競者數語即冰釋是以鮮有訟事卒後人多思慕焉郭念祖字聿修附貢生好善樂施有地廿餘頃輒僱老幼殘疾耕種之人問之則曰我志在濟老憐貧工多寡不計也鄉黨德之當時子孫滿堂曾孫敬佑中光緒丙子進士署廣西東蘭州知州人謂德行之報云

張會受字和叔附貢生母病幾殆默禱減算八齡以延親壽後果痊愈歿時適符其期自明以來邑中先達與科第者人與文皆湮沒不傳會受悉心搜訪閱二十餘年編輯成帙家非素封每周貧乏親族中有公私事皆倚賴之

禹德傑字漢三太學生沈厚爽慨嗣父貧本支兄德浚分產予之不

受先是公本生父玟亦以教讀為業而讓產於兄弟者也後家道少裕即延明師教子姪及戚黨之未學者值課日則具酒饌示獎勵由是成名者衆而德傑子建鈞亦捷南宮禹氏向無家祠德傑出數千金構造四時合祭後舉先人之嘉言懿行以示子孫輩又於廟旁置屋為義塾兼課族中子弟丁酉修 聖廟及本邑試院倡捐地址並銀千兩身任其役三年而始成邑侯請議敘堅辭不獲則分給族姪之老成者四人武郡修試院邑南鄉應攤百餘金德傑獨捐之而託名於其鄉之廩增附蓋不欲務名也壬辰歲大旱舉邑嗷嗷德傑出積粟千餘石按戶口多寡分貸之全活者不下千餘人及事過貸者欲償則其簿已焚之矣凡貧民之婚嫁喪

葬無不賙卹而於急難者尤加厚焉每歲抄聚鄉隣之困乏者於除夕前一日酌量分潤如是幾四十年鄉里咸頌德長于政堂附貢生任房山教諭年餘以思親引疾歸孝友一堂和睦鄉隣意藹如也修楊安鎮土圍捐二千緡人謂父子濟美云

潘聞韶字味斯嘉慶丙子舉人任平度州學政訓士以德行為本而文藝悉本先正舊有護莊田數十畝城宅一所忽族人訛賴慨然給予末與角縣令宗聞之曰潘君真德行君子也

張箕字惇欽舉人任萊蕪東阿縣教諭署兗州教授凝重端方不矜飾事父母躬奉甘旨曲盡于職居官勤慎與諸生講學剖釋經義終日不倦遇孤貧者不惜捐俸資助之

史護字佑堂廩貢生署平度州學正平度文風素陋任事後徧視學
宮改作垣墉以虛其中凡有碍於文運者鳩工飭材力行整頓是
科領鄉薦者三人由是文運日興至今猶盛稱之性孝友於物無
競田宅悉任弟擇里中有閱牆者見而知愧一時化乖戾為仁讓
年逾七旬雙親在堂孫曾濟濟人咸謂和氣所召云
宋涓字秦川太學生性孝友年四十餘在母前承歡有老菜綵衣之
風胞兄歿卜葬有堪輿曰長支之穴不如次支涓即以穴讓之且
命後人葬已於兄之右長子甘園邑庠生母卒廬墓三年朝夕哭
奠有依依終焉之志親友力勸之始歸家年已七十餘矣東撫楊
表其門曰純孝可風

王宗孔性孝友生平未嘗疾言遽色母病親侍湯藥滌穢器不以他
人貸衣不解帶者數月母歿弟求析居宅產任弟自擇自受荒宅
薄田焉至今子孫轉盛

李松鶴字壽世附貢生孝友慈良一生不見愠怒之色出嗣伯父道
凝承歡二親間伯父幾忘其無子者故終身不忍言析箸本支弟
幼以養以教以終其身及年老始將家產分為二而今弟擇一焉
族黨百餘戶無困乏者亦無詬誶者聞立村間即衣冠不正者皆
望望然先自避寔未嘗面責人也嘗言孝友任恤性中固有之事
苟有未盡即與心不快若少務名則已淺識禹德傑於困乏時相
凋相助以至於富厚及沒德傑歲時餽問拜跪墓前至歿世而後

已

李愛菊附貢生附生愛蓮之兄也性嚴正好讀書孝友逾於常人其侍母疾也不寢不息者四十晝夜母卒吐血斗餘一痛幾絕兄弟食同棹寢同榻寸步不離者四十餘年有坐客愛蓮終日侍立無惰容山東臬司李文耕聞之親書兄友弟恭匾額以旌之于鳳梧稟承家學造詣甚深因居城南士人皆謂城南一鳳云以歲貢生選訓導未赴任而終孫耀之附貢生席其舊業歷官江南旌德石埭等縣知縣有政聲

潘會芳字也園聞韶仲子也性嚴正朴古生平無戲言即細行亦循禮法性孝友分爨時以佳田讓兄弟而自處於廢園中家僅小有

而濟人不倦里中有不舉火者急以柴米贈之乞糶者輒多給之以故里人皆德之以優行廩生舉道光丙午鄉榜晚年選濮州學正州文風閉塞輒集諸生至尊經閣諭之曰閣名尊經諸生當顧名思義非徒以帖括獵取功名已也在閣講學闔邑生童求教者趾相接州屬曹府俗強橫多劫案各署遣役下鄉非縣隊護不敢行獨斗役獨行無劫之者且敬送之語役曰歸稟老爺某人叩首矣其感德如是卒於官極行之日闔邑士庶皆白衣冠送至境外兩子嶠峻皆庠生

王鶴慶字餘甫附貢生性敦厚學甚邃鄉試屢薦不第怡如也有餘資輒濟貧乏無吝色尤好裁成後進遇戚友子弟與之談學終日

無指容雖名志不遂而遠近士庶皆以名宿目之晚年就職同知王承芬字誦清博學能文力追先正而鄉閭屢薦不售遂以廩貢終年未四十失怙事繼母至孝飲食寢興晨夕省視數十年如一日撫諸弟恩義兼盡諄諄焉以仰承祖訓為勸戒仲弟承芸以廩生保教職文譽藉甚為一邑冠季弟承益由優貢捷南宮皆兄成就之力居多邑中有義舉慨然獨任勞怨不辭故同事者多被物議而承芬坦白無私人皆信之至老手不釋卷以舌耕為業循循善誘各因其材遊其門者多成名焉年八十無疾而終

賈鴻策字詞庵咸豐辛酉拔貢考取 武英殿校錄分發河南通判立行嚴正才識卓越同治戊辰捻匪亂奉派辦鄉團事平保同知

未赴卒於家

卞持基字厚甫太學生厚重自守治家勤儉待人寬和凡戚族鄰里之貧乏者無不量力周濟咸豐辛酉與禹啟堂族姪卞潤之同捐資修治圍牆以為保全計迨同治戊辰捻匪入境四鄉賴以無恙及平定後邑人欲為建祠孫受彤固辭不受遂專祠潤之焉次子清旭以晝夜守圩奉撫院丁奏保州吏目

朱名山性至孝母病幾殆貧不能供醫藥有人授以驗方云以七蟪螂治之可愈徧覓不得遂倚樹啜泣忽有蟪螂蠕蠕自穴出揀之適符七數歸以進母病頓痊人僉謂其孝感

賈亨復字少峯廩貢生任堂邑縣教諭濟甯州學正性孝友樂施予

周濟困乏出於至誠咸豐三年身逆北犯奉撫憲札派辦團練一邑倚以為重在學署嘗刊約我齋制義四書思辨錄分頒諸生文風丕變

張槐字蔭清性友愛叔沒無嗣叔母以其醇厚議子之因事格竟以其伯兄嗣槐怡然辭退旋以食指太繁與仲兄析居凡田宅先取其瘠者有舊債不使兄聞先自清理里黨交稱之

鄭鄴亭字沁園與弟鄭奠亭字少陵孿生容貌酷同鄉隣莫能辨及長競爽才學亦相若時人稱為二鄭俱以歲貢終奠亭七十餘選沂水教諭不忍離兄遠去兄強之至八旬餘歸兄已先亡懊悔莫及年九十卒

張倩字曼軒邑庠生父司鐸東阿卒於官數百里徒步扶柩歸服除設帳授徒束脩不計教人以孝友為本經史中事關倫常必切切言之同治間捻逆逼城盡力守禦獨不言功事母克盡孝養母病侍湯藥衣不解帶及母沒哀毀過禮精神恍惚不數月卒

鄭汝文字樸菴廩貢生通經史精文選中年摒擋家務督耕而外課子讀書恒夜間迫令背誦好施與戚鄰有貧乏者量力給之不索償也故隣貧無食者皆曰尋鄭善人去嗜種樹宅邊路旁種殆徧人無盜伐者後無疾而終

王甫興字振子讀書靈敏善書法就食巖署館頗豐因母病歸數十午親侍湯藥晝夜周問饑歲賙濟鄉隣無少吝至捐館舍時四壁

蕭然家無長物

李毓珩字韻珊邑庠生孝友仁厚生平無惡言遽色父以縣令需次直隸讀書之餘上奉慈闈母嘗患手瘡痛楚經年朝夕承歡時誦稗官小說以娛親幾忘其痛楚教弟及子甚嚴讀書外無他事戊辰捻匪之亂守圩出力全活數萬人事平邑令舉保則讓於仲弟三弟未成丁而亡為立碣植樹環墓割地八畝以作祭田待人溫和藹然可親隣近及親友中有爭訟者一言即止時書古賢之格言於四壁尤服膺司馬溫公吾無過人處但生平事無不可對人言之語其自勵如此

潘巨源字冶峰郡庠生端謹誠懇不苟言笑事母有至性奉侍左右

衣不解帶者二十載扇枕驅蚊皆躬自任之同治戊辰遭捻匪之變家道中落雖屢歲不登而甘旨之奉未嘗少缺年近七十猶依依如孺子焉又置祭田修宗祠貧族之婚嫁喪葬無力者皆竭力出資不少各族有無賴子屢受其欺不與校性好學手不釋卷著有學庸解藏於家

張道南號墨林任曲阜縣訓導善事兄卸任後與其兄爾學友愛益篤年老酷嗜書法兄弟同處一廬習字餘暇即相與閒談食則同席卧則同牀有怡怡之樂焉

呂繼儒字席珍同治六年本莊修橋工甫竣即遭亂所存款項盡失同事者皆避去其妻王氏勸曰有產業在賣以修橋亦可也遂賣

地償債時尚乏嗣後得二子咸謂食報尤精醫術雖星夜寒暑不
辭鄉隣咸德之

史炳彝字星源性豪爽不事生產以光緒乙亥舉人司鐸曲阜與諸
生立文社造廬請益者日衆學舍素隘諸生捐資以拓其基一時
有桃李滿門之目卒於官幾不能歸諸生助資不期而至者數百
相向而哭婦孺亦悲悼不置云

宋星五生九月失怙無伯叔行其母席氏苦節自貞教以義方後家
道寔昌恤孤憐貧望重一鄉以資官詩禮堂啟事為母刻石於墓
旁又復養一義牛為貧者耕種田畝其輕財好施便於村里類如
此

卞潤之字東里附貢生候選訓導少孤事節母以孝聞弱冠入邑庠
鄉閭屢躓遂授例貢成均就學官以封贈父母性慷慨好善樂施
與諸弟析箸取少讓多息爭訟恤困乏種種義舉為里人所推重
咸豐間粵匪北犯潤之以楊安鎮為通衢賊至必受蹂躪乃做堅
壁法沿街築圍牆首捐三千緡及磚石木料以為倡剋期鳩工矧
若長城同人多非笑之弗顧也同治戊辰捻匪竄樂風鶴告警遠
近來避難者盈街填巷無隙地賊再至不敢犯獲安全者以萬計
人始服其先見既沒合七十餘村建祠祀之

宋登先字遇文庠生品行端方教讀為業生徒成就者衆著有四書
便蒙藏於家晚年病癱瘓兩腿如冰非人不煖于椿壽至孝畫則

耕作夜則為父溫腿如此者八年賣田以供甘旨不令其父知聞有醫藥不憚千里之遙至京都者二次至遼左者一次每次出外則跪其妻前懇令盡心奉侍妻亦能奉侍無少缺乏
史延祐字助臣由癸酉拔貢就職州判因親老多疾無人奉養遂絕意仕進以拔貢終性孤介見人有過輒面斥之不少貸人亦服其誠信莫敢與爭族中有墜田數十畝取資甚薄乃酌捐益之精書法工詩律一時英俊多出其門

孟玉貞邑人孟鳳祥女也母守節無子女朝夕事母誓不嫁性剛烈喜武藝同治戊辰捻匪蠶至村人盡逃母病不能動女持刀院內與賊格鬪眾莫敢近賊呼曰女娃子雌而雄者也或於暗中放洋

槍中女左臂乃棄刀負其母而逃賊感其孝不窮追遂得免東撫丁表其門曰忠孝成勇終身不嫁母卒既殯猶依依不離焉

按中國女權之不振久矣以柔順為儀則以有才為多事遂使二百萬萬含生負性之倫盡置諸無用之地此中國所以貧且弱也當逆匪猖獗之時即統軍諸大吏且畏而避之玉貞以一弱女子力抗萬眾而不懼無他孝至故勇也充斯義也上可以忠君而強國下可以保種而攘外安在女權不由此發達哉故附論之

畸節

賈治字寧遠性鯁介非其有絲毫不取鄉黨有善舉則義形於邑馬津界樂陵鹽山之間夏令河水陡發人艱於渡治倡修高家莊橋梁三間堂舊有橋久廢壞又重修之

潘體臨字君宜歲貢生生平濶達豪邁喜飲酒好賓客放言不檢以此忤人或告之則徑往謝過呼酒與飲至醉去無纖芥與兄分田取碗者其奴僕自取猾者曰若輩易怒而難使不以累吾兄弟尚幼繩之嚴不事姑息學官張某卒貧不能歸英體臨百計維持卒返其柩習舉子業喜出新意然卒困於棘闈而終

王夢慈號叢生太學生居恒方正自持喜讀書故義方之訓獨嚴適

乾隆間邑修城隍廟羣以誠樸推公會計洎工歲結帳目短五百餘緡不得其故夢慈恐妨名譽乘隙投環而卒戚友聞變皆悼惜覆核有漏款與所短數合疑竇始明先是王氏自永樂間遷居樂邑無仕宦者後子所禮所甄所擢所舉均力學多仕進至道咸間曾孫榮第榮瑄乙巳庚申兩科兄弟相繼同入翰林仕至監司大員累贈封誥焉

所禮號虛谷乾隆甲午科優貢歷官河南睢州州同東昌府上河通判調任淮安府中通判所在多循聲上憲每倚重焉樂陵有優貢實此始善屬文有古體詩集各種藏於家

所甄號陶村乾隆癸卯優貢任萊蕪訓導性靜直服食朴素恪守

先訓文章岸異為時輩所推許歲科屢試優等秋闈薦而不售詩學頗深任司訓時課士外凡事無關學校者一無干預萊邑士民皆稱之

所擢號小山乾隆丙申由廩生應

東巡召試

欽取二等充四庫全書館行走丁酉拔貢館滿議敘授招遠教諭俸滿選浙江龍泉縣知縣親老告近選直隸滿城縣知縣調廣昌縣知縣至性過人寡言笑似無所能者及持議行事一無詭隨內艱歸居廬次追念父不以壽終抱痛隱泣遂謝病不復出素耽典籍書法為時推重初教職報滿以賦刈麥七古受知上憲得卓異晚年

尤工於詩學所著羅峯過里都門邊城病餘詩稿藏於家所舉號竹岩五歲失怙幼穎敏從諸兄讀少長就外傳刻苦力學十七入邑庠二十二以增生中乾隆庚子鄉試舉人屢上春官不第以大挑知縣仕江西諸兄均已筮仕以母老告近改直隸歷署東安無極威縣題補龍門知縣復告終養服闋赴江西原省歷署龍泉星子貴溪龍南題補瀘溪縣在東安時清理積案頗多署中舊例天棚杆席皆取諸民至則悉裁免龍門僻在邊外適大水為災詳請平糶捐廉設粥廠暨流養局給棉衣口糧全活者無算江西星子貴溪龍南等縣俗多械鬪彈壓撫綏均各畏服任瀘溪三載捐廉倡修文廟邑有鶴城書院捐資提倡文風以振士子自此有領鄉

薦者又嚴禁溺女惡習並修育嬰堂二處瀘溪境多山糧米貴東門外原有河渠處貴溪下游水淺石多舟楫不利因設法挑濬貴溪米穀素饒運糧較便瀘民得無饑服官二十年寔心寔政皆有惠澤及民云

宋曰鎮乾隆壬午武舉湖北襄陽衛領運千總勤慎供職陞署武昌衛守備在任五月捐俸賠墊虧項不以累同官致仕旋里卒年八十有三

楊世寬常義成楊鐵匠家莊村氓也傭工自給地近高津有橋久圯行人苦之二人矢志重修連年積傭資八十餘緡釀酒邀隣近有名望者董其事有辭者則長跪以請眾感其義資財雲集二人奔

走服事橋成因名曰工化橋

王乾正王家莊民捐金百餘兩修建永甯橋復募金造義船四隻並捐地三十畝以歲收為修船掌渡之費渡頭蓋屋數椽晝則待渡者男女以別時避風雨夜則掌渡者支更守候咸稱義士焉

王琛號加玉秉性個倘能治家初出繼於族中殷寔之戶後有爭繼者另議繼嗣公毅然曰此事爭訟理自得直但人必謂吾利其財耳竟讓以歸勤儉自持竟立家室後嗣能保守之

王銳字穎之嘉慶丁卯科舉人大挑知縣請改教選日照訓導到任時先誨諸生立身敦品之道後示以詩文之法不干預公事士林多所成就寅僚咸引重焉

張化龍字鎮海慷慨好義道光二十五年以武童投軍歸直隸提標補通永鎮標右營頭司把總旋擢千總補密雲營石塘路把總咸豐六年發往金陵住紮六合八年以軍功保都司補甘肅涼州鎮標後營守備仍留防六合十一年剿賊陣亡

潘錫康字子駿豪放嗜酒不理生產博學能文尤工詩自漢魏來凡著名詩集披覽殆遍著有芥舟書屋詩草數千首晚年家中落飲益豪友人贈句云易生感慨因無酒不負遨遊賴有詩其梗概可見

禹詵字致堂慷慨爽快族兄建鈞卒於河南任所詵千里赴喪携其眷而還戊辰四月捻匪犯樂陵與李溫其同心防禦分守楊安鎮

寨布置井井冠大隊蠶至民心惶恐詵獨鎮之以靜賊知不可犯遂去及六月賊復自南而北楊安鎮又當其衝嚴為守備遂得保全事平保縣丞他其餘修廟建橋賑窮之義舉不可枚數

史炳箕字東維拔貢教習知縣改刑曹因親老旋里不求仕進平居力崇儉約不事紛華非公不至縣署有事邑令輒詣廬議之人不敢干以私工書法繪事兼精音律後以守城功晉觀察

宋志熊咸豐間督辦團務勦除賊穴地方以靜同治戊辰捻匪過樂同紳士守城晝夜不懈賞六品頂戴後官四川甯遠府會理州吏目辦案有功晉廣遠知縣

楊率祖字攸行急公好義居近禹津河舊有橋梁光緒十三年觀察

金挑為減河橋旋圯率祖約同首事重修並添修耳橋一座疊道五里約費萬金觀察嘉其能津貼千緡並保舉州同職銜兄念祖性亦慷慨邑修文廟捐銀三百兩得獎五品職銜

賈亨嘉字遷友性情敦厚輕財好施同治六年捻匪亂奉派辦團練事平保州吏目督修三間堂利民橋獎五品頂戴

尤大中字允卿尤家莊人也事繼母以孝聞一生言語資財不與人爭有負欠者聽其自還然尚義勇敢同治七年捻匪蜂擁而至大中率鄉勇數百人迎擊之自申戰至戊賊漸退踴躍逐北遂入重圍死者十一人大中亦被重傷

鄭凱元字虞臣太學生直隸州州判壯歲兄苓泉供職京都奉祖命

主持家政同治戊辰捻匪竄至樂陵鄉人議舉為團長督眾禦之於韓家莊時匪彌滿四野鄉勇僅千餘人或勸勿出凱元慨然曰吾父子兄弟俱受

國恩焉可顧身而忘大義乎遂將眷屬送入城屬家人曰勿令父母知挺身而出遂及於難

藝能

賈文宿習岐黃術繼父業究心脉理遂以醫名造廬者踵相接經治無不效

潘勁字貞齋廩貢生肄業國子監期滿以訓導用工書法尤長於行書逼似秣陵碑

史尚醇字厚齋乾隆己亥

恩科亞元任德州訓導性儉朴非公不至長吏之庭在任二十餘年旋里後琴書外無長物善書法至今人猶寶之後陞知縣因親老未之任

史選雋字篋周樂善好施救困扶危惟恐不及兼精岐黃雖嚴冬夜

樂陵縣鄉土志

卷三

六十三

半常不俟輿而行遇貧乏家裏藥餽遺之鄉黨稱盛德焉

賈三幹字崑源太學生少負異才善河洛尤粹於堪輿未弱冠游京師與當時顯者周旋援例捐州吏目著有地理圖說行於世以從子聲槐官給事中

馳封朝議大夫

潘德雋字味書乾隆庚寅

恩科順天舉人任直隸易州學正截取選瑞昌知縣工書法有銀鈎鐵畫之稱

鄭馨庭號錫銘太學生精岐黃熟讀醫林諸書遠近求診者無不應所至必愈至此之於和緩

鄭熙號怡堂太學生諸凡宦遊獨持家政十數年及諸兄歸分資於諸弟獨不受祇取舊產百畝餘潛心醫理尤精脈經有不能療之症一治無不立起踵門求診者日常如市

張際同字從甫恩貢生學粹品端風骨峭峻治家嚴肅於鄉里則勸善規過授生徒不受束脩捐金修文廟散穀賑凶荒置義牛義車供村中貧乏之用田中有無主墳墓六七處皆補葺而修築之尤善外科不顧寒暑不受餽謝有強餽者則棄之地父母沒後每晨必拜於主前至八十餘不懈孫自厚字身之號雨嵐歲貢生簡默厚重尤精算術窺幾何天元之秘而仗義疏財卹孤賑貧從學其衆不受贄儀門人感恩為建祠送匾諸弟子姪皆教之成名蓋世

德相傳云

杜芳生以醫術濟世尤善針灸暮年鍊火針戳患處只覺熱氣一縷透入骨髓無不沈疴立愈治風寒尤效後又以掌打病亦奏功不受謝即一茶一飯亦不苟有謝者厲辭絕之其弟友生亦能以其術濟人

蘇雁題字秋第歲貢生性仁厚品端方事親孝卹貧乏工書法精痘疹課子登賢書壽八十四歲

蘇映辰字星橋咸豐辛巳

恩科舉於鄉任齊河縣訓導莅任一年告終養回籍至性醇篤事雙親能博堂上歡課二子皆成名每辰早興跪誦佛經為父母祈壽如

是者幾三十年精岐黃凡求診者無論星夜寒暑必赴
潘子春字元復精岐黃術設藥舖半捨半售全活無算
潘錫侯字子晉精醫術遇貧乏無力者每就醫之不俟車而行鄉里
皆稱道不衰

潘錫朋庠生生平酷嗜詩著有蘿月軒吟草藏於家

常華亭字佩貫太學生好學博覽淡薄功名通堪輿精岐黃雖雨天
星夜不憚煩遇貧無力者恆自駕往視子汝鶚字薦侯例貢生精
醫術能繼其父風

張廷輔字翼山學岐黃研究靈素人有求者片刻不待曰人命惟急
也行醫於鹽山邵謝資辭餽遺沒後遐邇莫不識蓋皆受

診人也

王盤字新亭例貢生南京亂慷慨從戎從勝帥保屢著戰功未得保
奏而歸遂以醫術濟世與人醫必以慎起居節飲食相勸踵問病
者日相接尤精眼科一時咸稱聖手

賈興賢同治癸酉拔貢候選直隸州州判有孝行母李氏患痼疾日
侍湯藥寢不安席者幾二十餘年性穎敏工楷書詞賦篆刻無不
精妙

